


三字經集註

全

仁濟
2347



門 〇 仁 13
躰 2347
卷

宋 王應麟纂
日本 渥美正幹註

泉 野 齋 藏

三字經集注

版權免許 讀書有味齋藏



三字經集注序



三字經行於世久矣。其文簡而意足。語質而義盡。唯以其簡質也。塾師動苦講說。徒資諷誦。尚其義則茫焉。

三字經集注

文部少書記官依田氏序

一

三石齋集言
况於童蒙家乎。友人滙美貞如
為著集注。為證博引。炳若
觀空。師弟子並得其益也。昔
者明光宗為太子。甫九歲。會
大臣謁見。問太子曰。殿下頃

讀何書。曰。漢三字經。因誦其
句。不誤一字。可見此書不獨
行民間。太子亦習之。頃者鄉
塾課業。閒用漢文。其書陸
續上梓。率庸陋無可觀者。

此本漢出既為產蒙課本
亦宜行於我者遂序之

明治癸未一月

學海依田百川并書



序



嘗觀於場師之毓卉木。審其土壤。護其萌芽。曲者使之直。屈者使之伸。封殖厚而枝葉茂矣。培根深而花實美矣。養生豈易之道。何以異于此。是故古之善養蒙者。陶之以德。

行。鎔之以文學。心思之所服。孝悌
忠信。耳目之所習。禮義廉恥。邪僻
之念。無蘖於內。故其教易從。而其
道易行也。及至後世。學不繇其統。
道不務其本。騁私智。逞私見。詭變
百端。妖妄荒惑。學愈歧而道愈離。

甚則以道德仁義為迂腐。豈有復
養蒙之術哉。伯厚王氏生於宋
末。崇尚正學。立朝侃々。論治道。言
時務。奸人忌憚。退居終身。所著書
數百卷。皆益于世。而此編其課家
塾者。言尚理晰。深切詳明。洵啓蒙

之模範。入學之津梁也。方今右文之化。宣布四境。大小之學。設立都鄙。此宜充教課者。乃竊不自揆。參考諸書。輯釋其義。余也因淺學陋聞。豈敢謂闡發其底蘊乎。聊以為多學之資耳。雖然。童蒙階此。溯

及聖經賢傳。則春華繁然。並收秋實。是亦

聖朝右文之澤也哉。

明治十五年壬午十二月

坦庵渥美正幹撰并書



例言

一此編元明以來為童蒙課本。而間有加註者。蓋坊間刻本。訛謬不少。今參酌經史。專輯事實。以資幼學稽古之力。

一此編用韻語。便諷誦。大抵四句一解。間有八句十句者。一解一韻。今每解夾註。使讀者一目瞭然。

一此編坊刻本。文字有異同者。今彼此考訂。以付剞劂。庶不誤童蒙。

正幹又識

三字經集註

宋 王應麟伯厚纂述

日本 渥美正幹貞卿集註

人之初。性本善。性相近。習相遠。

天之所賦為性。本自至善。人之初生。氣稟雖有清濁厚薄之異。其性善則甚相近。而無別也。及于知識既開。其善惡甚相遠者何也。習氣使然也。故君子能有養正之功。而不使幼穉之性移于不善也。

苟不教性乃遷教之道貴以專

養正謂何。教學是也。苟有子而不教。則昧天賦之良。悖理縱欲。日遷於不善矣。然則教之道。貴專而不倦也。

昔子孟母擇鄰處子不學斷機杼

昔之能教子者。莫如孟母。孟軻。戰國鄒人。早喪父母。仇氏。其舍近墓。軻幼時嬉戲。為埋葬哭泣之事。孟母曰。此非可以居子也。去舍市傍。軻嬉戲。為賈人街賣之事。孟母曰。此亦非可以居子也。復徙舍學宮之傍。軻乃為捐

讓之禮。進退之節。孟母曰。此可以居吾子矣。遂居焉。論語曰。里仁為美。擇不處仁焉。得智。古諺云。交必擇友。居必擇鄰。此之謂也。孟母日事織紡。軻稍長。出就外傳。學倦而歸。孟母引刀斷其機。軻懼問故。母曰。汝之學。猶吾之織也。積絲成寸。積寸成尺。尺寸不已。遂成丈匹。今汝學倦而歸。猶吾織未成而自斷其機也。孟軻感悟。乃受業于子思之門。紹明聖學。○仇音掌。

竇燕山有義方教五子名俱揚

後周竇禹鈞。幽州人。以地屬燕。號燕山。其為訓也。家庭

之禮肅於朝廷。內外之防嚴於宮禁。父子之訓凜於官師。教五子儀儼侃僖。相繼登科。名揚宋朝。世謂竇氏五龍。馮道有詩云。燕山竇十郎。教子以義方。靈椿一株老。丹桂五枝芳。

養不教。父之過。教不嚴。師之惰。

父於子。不患不慈。但患失教。師於弟子。不患無教。但患不嚴。不教不嚴。則志荒業廢。非父師之過之惰乎。

子不學。非所宜。幼不學。老何為。

父教師嚴。而子學問無成。非所宜也。夫幼年方志學之時。倘不學。日復一日。及其老也。悔無及矣。朱子勸學文曰。勿謂今日不學。有來日。勿謂今年不學。有來年。日月逝矣。歲不我延。嗚呼。老矣。是誰之愆。

玉不琢。不成器。人不學。不知義。

美玉不琢磨。不成圭璧之器。猶人雖有美材。不學問。則不能知理義也。

為人子。方少時。親師友。習禮儀。

凡為人子者。方少年之時。宜親嚴師。益友。講習禮節儀文之事。以為立身之本也。

香九齡。能溫席。孝於親。所當執。

後漢黃香字文彊。江夏人。九歲失母。事父盡孝。夏月則扇床。嚴冬則以身溫席。凡孝於親者。所當執此以為法也。香博通經典。能文章。世號曰天下無雙。江夏黃童。

融四歲。能讓梨。弟於長。宜先知。

後漢孔融字文舉。魯國人。四歲即知弟順。時與諸兄食

梨。融後取其小者。人問故。答曰。我本小兒。當取小者。此弟於長者。宜先知也。融後值漢室之亂。兄弟一門爭死。其友愛之風。燦然千古矣。

首孝弟。次見聞。知某數。識某文。

孝弟之道。人倫之所當先。見聞之理。幼學之所宜知。知其目。為數。識其義。為文。論語曰。行有餘力。則以學文。易曰。君子多識前言往行。日新其德。

一而十。十而百。百而千。千而萬。

此以下言知某數也。一數之始，十數之終，百千萬乃推極其數而言之也。

三才者，天地人。三光者，日月星。

陽之輕清上浮而為天，陰之重濁下凝而為地。有天地然後有萬物，人生其間為萬物之靈。故曰三才。日陽精，照臨于晝，月陰精，光明于夜。日月與五星列宿，懸象于天，故謂之三光。

三綱者，父子親，君臣義，夫婦順。

綱者統系也。天下之大綱有三：父正于家為子綱，君正于朝為臣綱，夫正于室為婦綱。三者既正，則父慈子孝，君聖臣良，夫和婦順，然而宇宙清寧，邦國平康矣。

曰春夏曰秋冬，此四時運不窮。

此言一歲之序，一歲分為四時，應于北斗。斗柄東指在寅卯辰，於時為春，春蠢也。萬物發動，斗柄南指在巳午未，於時為夏，夏大也。萬物長大，斗柄西指在申酉戌，於時為秋，秋收也。萬物收斂，斗柄北指在亥子丑，於時為冬，冬終也。萬物終藏，此四時運轉不窮，寒暑往來而歲

功於此乎成焉。

曰南北曰西東此四方應乎中。

此言四方之位。南屬火。北屬水。西屬金。東屬木。中央屬土。土居中用事。而四方皆應之也。

曰水火木金土此五行本乎數。

天地之間陰陽二氣化生五行。此五行本乎河圖之數。天一生水。地六為之之類也。洪範曰。水曰潤下。火曰炎上。木曰曲直。金曰從革。土爰稼穡。

曰仁義禮智信此五常不容紊。

惻怛之謂仁。裁制之謂義。莊敬之謂禮。明察之謂智。誠實之謂信。此五者日用常行之理。不可紊亂也。

稻粱菽麥黍稷此六穀人所食。

稻有粳糯早晚。粱有黃白。菽豆也。有大小數種。麥有大小。黍有粘粳。稷有黃黑。此六穀天所生而人所食也。

馬牛羊雞犬豕此六畜人所飼。

馬牛能負重致遠。犬能守夜。雞與羊豕畜之備食者。凡此六畜飼之得其宜則生息蕃滋而為利溥矣。

曰喜怒曰哀懼愛惡欲七情具。

情者性之發也。歡樂為喜。忿氣為怒。感傷為哀。恐畏為懼。眷戀為愛。憎嫌為惡。貪得為欲。凡此七情。智愚賢不肖皆有之。惟君子出之以正。發必中節。可不慎乎。

匏土革木石金絲與竹乃八音。

此言八音之器。匏瓠瓜也。笙竽之類。土瓦器也。埴甃之

類。革用為鼓。木用為祝。石用為磬。金鑄器。鐘鏞之類。絲絃線。琴瑟之類。竹用為簫管。凡此八者。先王製之以作樂薦上帝。祀祖考及宴享賓客。

高曾祖父而身。身而子。子而孫。

自子孫至玄孫乃九族人之倫。

此言九族之倫。一曰高祖。高最上之名。祖之祖也。二曰曾祖。曾層疊也。父之祖也。三曰祖。祖始也。父之父也。四曰父。謂之嚴君。五曰身。己之身也。六曰子。妻生為嫡。妾

生為庶。七曰孫。孫系也。統系相傳也。八曰曾孫。孫之子也。九曰玄孫。孫之孫也。自高祖至玄孫。凡九世矣。九世之所出。謂之九族。族眾也。倫。序也。

父子恩。夫婦從。兄則友。弟則恭。

長幼序。友與朋。君則敬。臣則忠。

此十義。人所同。

自人倫推之。又有十義。父慈子孝。主於恩。夫唱婦隨。主

於從。兄友弟恭。敦其義。同德為友。同類為朋。長幼序矣。君敬臣忠。君上下交矣。此十義者。人所同具也。

凡訓蒙。須講究。詳訓詁。明句讀。

此以下發明識某文之義。蒙者物之初生。蒙昧未明也。凡訓童蒙之道。須講究其義理。而詳證字義。點明句讀。語之絕處。謂之句語。未絕處。點分。謂之讀。○讀音豆。

為學者。必有初。小學終。至四書。

為學之道。必有初事。自淺入深。不可躐等。古者人生八

歲先入小學教之以洒掃應對進退之節禮樂射御書數之文朱子著小學一書有內外篇學者講得明白然後可以及四書也

論語者二十篇群弟子記善言

論語孔門傳道之書有齊論魯論齊論今不傳魯論凡二十篇孔門羣弟子所記其訓述問答皆聖賢善言也

孟子者七篇止講道德說仁義

孟軻當戰國之時遊于齊梁其道不行退與公孫丑萬

章之徒著孟子七篇所記皆存天理去人欲尊王賤霸講明道德仁義之旨

作中庸子思筆中不偏庸不易

孔子之孫伯魚之子名伋字子思作中庸凡三十三章程子曰不偏之謂中不易之謂庸所言皆人生日用不可須臾離之道

作大學乃曾子自脩齊至平治

曾子名參字子輿孔子弟子述聖經作大學三綱領八

條目。皆學者之先務也。中庸大學。本出於禮記之篇名。朱子取而章句之。以列四書。

孝經通四書熟如六經始可讀

孝經曾子門人叙孔曾問答之言。為經十八章。以明孝道。學者四書既熟。目通孝經之後。循序而可讀六經也。

詩書易禮春秋號六經當講求

易詩書春秋周禮禮記是名六經。學者當講習而求其義也。當時周禮列于六經。今則去周禮為五經矣。

有連山有歸藏有周易三易詳

易之書有三。一曰連山。夏之易。以艮為首。山之象也。二曰歸藏。商之易。以坤為首。地之象也。三曰周易。文王之易。以乾為首。天之象也。三易皆詳天地之數。而連山歸藏不傳。今存周易一書。伏羲畫八卦。文王繫彖辭。周公繫爻辭。孔子繫彖傳及大小象文言。上下繫辭。經四聖人而成全易也。秦焚詩書。惟易為卜筮書。故得不毀。

有典謨有訓誥有誓命書之奧

書虞夏商周四代之書也。典常也。堯典舜典是也。謨謀也。大禹謨皋陶謨益稷是也。訓誨也。如伊訓誥告也。如仲虺之誥大誥之類。誓甘誓湯誓之類。命說命微子之命之類。皆書之。與義存焉。昔孔子刪書斷自唐虞。凡百篇。秦火之後。漢文帝時得伏生口授二十八篇。至武帝時。魯恭王壞孔子之舊宅。得壁中所藏古文尚書。

我周公作周禮著六官存治體

我親之辭。周公名旦。武王弟。所作周禮。周家設官分職之制。有天官冢宰。地官司徒。春官宗伯。夏官司馬。秋官

司寇。冬官司空。號六官。紀綱周布。制度分列。以存治體。秦火之後。至漢始出。而亡其冬官。漢儒以考工記補之。

大小戴註禮記述聖言禮樂備

禮記一書。後儒纂述先聖之言。以成書。故稱記而不稱經。大戴漢儒戴德。小戴德。兄子戴聖也。德集古禮樂諸書百八十篇。刪定為八十五篇。名大戴禮記。小戴更裁定。成書四十九篇。大戴禮記今不行。小戴禮列于五經。

曰國風曰雅頌。號四詩。當諷詠

詩之體有四。一曰國風。民俗歌謠之詩。諸侯貢之于天子。天子列之樂官。以知風俗之美惡。政治之得失。二曰小雅。諸侯朝覲及列國之君迎勞使臣之詩。三曰大雅。天子宴享諸侯卿士及王朝公卿會宴陳述之作。謂之雅者。其體典雅以別於風也。四曰頌。天子祭祀郊廟。頌美先王之樂歌。是謂四詩。學者所當諷誦而詠歎也。秦火之後。漢儒毛萇考定成書。故謂之毛詩。

詩既亡。春秋作。寓褒貶。別善惡。

孟子曰。王者之迹熄而詩亡。詩亡然後春秋作。王者之

迹。文武之迹也。文武之謨烈。成康之盛世。周召之宏勳。宣王之中興。皆見於四詩。是王者之迹。因詩以存也。自東遷以降。樂師不陳詩。而風亡。諸侯不朝覲。而小雅亡。天子不享諸侯。而大雅亡。諸侯不助祭。而頌亡。四詩既亡。而王者之迹熄矣。非直黍離降為國風。而雅亡而已。孔子生東周之末。傷王政之不行。慮亂臣賊子之禍。因魯史之舊文。而作春秋。四時皆記。錯舉春秋以為名也。起魯隱公元年。歷十二公。至獲麟。絕筆。紀二百四十二年之事。一字之褒。榮於華袞。一字之貶。肅於斧鉞。其善惡明。而亂臣賊子懼矣。

三傳者有公羊有左氏有穀梁。

傳所以釋經傳春秋者有三。左氏名丘明。或云楚左史倚相。編年紀事甚為詳明。公羊名高穀梁名赤。漢儒三傳各有短長同異。左傳有晉杜預註。公羊傳有漢何休註。穀梁傳有晉范甯註。經非傳不明。故并存之。

經既明方讀子撮其要記其事。

先明六經後讀子書。諸子醇疵互見。只撮要言記事跡。則見聞廣。心思擴。而知識為之日充矣。

五子者有荀揚文中子及老莊。

諸子百家不可勝紀。其最著則有五子。老子姓李名耳。亳邑人。東周時為柱下史。作道德經五千言。莊子名周。楚蒙城人。為漆園令。作南華經。荀子名卿。戰國趙人。仕楚為蘭陵令。作荀子上下二篇。揚子名雄。漢成都人。作太玄經。法言二書。文中子姓王名通。隋龍門人。作元經中說二書。謚文中子。

經子通讀諸史考世系知終始。

六經諸子既通。然後諸史可讀也。史書紀治亂興亡之事。其體有二。曰通史。曰國史。國史紀一朝之事。如漢書。晉書之類。通史紀歷朝之事。如通鑑之類。國史有紀傳志表。通鑑則編年叙事而已。其世系之傳授。始終之歲年。可考而知也。

自羲曲辰至黃帝號三皇居上世

鴻濛之始。伏羲以前不可得而詳也。史記以伏羲為始。太昊伏羲氏。畫八卦。造書契。制嫁娶。為萬世文明之祖。炎帝神農氏。為耒耜樹藝五穀。立生民養育之道。黃帝

有熊氏。制衣裳。定禮儀。文明大備。作萬國具瞻之表。號為三皇。居上世。為帝王之冠。史記列於前編。

唐有虞。號二帝。相揖遜。稱盛世。

黃帝之子。少昊金天氏。在位八十四年。黃帝之孫。顓頊高陽氏。在位七十九年。金天之孫。帝嚳高辛氏。在位七十年。并堯舜為五帝。作者但言堯舜者。以其功德最高也。帝堯陶唐氏。高辛少子。兄摯無道。諸侯廢之。而立堯。其始封于陶。故號陶唐氏。在位七十二年。子丹朱不肖。求賢而禪于舜。舜有虞氏。黃帝之裔孫。瞽瞍之子。克諧

以孝四嶽薦之堯堯遜以位在位六十一年子商均亦不肖舜禪于禹唐虞之際世樂雍熙相揖遜而有天下可稱盛世矣自黃帝至舜六世凡四百八十年

夏有禹商有湯周文武稱三王

繼舜而有天下者夏禹也繼夏而有天下者商湯也繼商而有天下者周武也兼言文者新天命也是皆三代受命之始祖稱曰三王矣

夏傳子家天下四百載遷夏社

五帝以天下為公傳賢而授位是官天下也若夫家天下則自夏后氏始禹姒姓顓頊之後禹嘗薦益于天而其子啓賢能繼禹之道禹崩之後天下之民不從益而從啓曰吾君之子也啓立踐位傳至十七世桀無道而湯伐之遷夏社凡四百五十八年

湯伐夏國號商六百載至紂亡

商子姓帝嚳次妃簡狄生契封商傳十三世名履是為湯伐夏桀而有天下都亳國號商至盤庚改號曰殷至二十八世紂暴虐無道而國亡矣凡六百四十四年

周武王始誅紂八百載最長久。

周姬姓。武王名發。父文王昌。率紂叛國。事紂。紂暴虐百姓。苦之。至武王不得已而誅紂。諸侯尊為天子。傳十三世。至厲王失國。宣王中興。至幽王為犬戎所殺。平王東遷。至赧王而周亡矣。共三十八世。凡八百七十四年。國祚之最長久者也。

周轍東王綱墜逞干戈尚遊說。

轍迹也。周自平王東遷于洛邑。政教號令不行。王綱墜。

始春秋終戰國五霸強七雄出。

緒。諸侯強大。互逞干戈。遊說之士如蘇張。遍歷列國。

平王東遷之始。則為春秋。孔子絕筆之後。則為戰國。春秋諸侯有齊桓晉文秦繆宋襄楚莊。迭為雄長。會盟諸侯。謂之五霸。至威烈王以後。大國吞并小國。而七雄出焉。如秦楚齊燕韓趙魏。僭王自尊。互相攻伐。周室衰微。徒擁虛器耳。

言嬴秦氏始兼并傳二世楚漢爭。

秦嬴姓伯益之後非子起自西戎善養馬事周孝王封於秦至襄公繆公國日富強惠文稱王蠶食列國至昭襄益大吞并諸侯至孝文莊襄滅東周君迨至始皇翦滅六國而一統天下自以德兼三王功過五帝銷兵革築長城焚詩書尚律令在位三十七年巡狩崩于沙丘宦者趙高矯詔殺太子扶蘇而立少子胡亥是為二世酷暴厚斂天下大亂項羽立楚後伐秦劉邦起兵入關滅秦二世已為趙高所弑子嬰素車白馬而降秦有天

下四十三年而亡矣項羽自稱西楚霸王封劉邦為漢王未幾漢與楚爭凡七十餘戰終破楚于垓下項羽勢

窮自剄而漢興矣。

高祖興漢業建至孝平王莽篡

漢高祖姓劉名邦字季沛豐邑人興自泗上亭長誅暴秦滅強楚建漢家之事業都長安十二世至平帝而王莽篡位王莽者孝元王皇后之兄子也以恭謙竊名而致宰相鳩殺平帝假立孺子復廢之而自立僭位凡十八年光武亡之

光武興為東漢四百年終於獻

後漢光武皇帝名秀字文叔景帝七世孫以布衣起兵
誅王莽滅羣盜而復漢室都洛陽是為東漢十二世至
獻帝曹丕篡位兩漢共二十四世四百二十五年

魏蜀吳爭漢鼎號二國迄兩晉

魏曹操字孟德譙人當董卓之亂漢帝蒙塵操迎駕都
許挾天子令諸侯子丕篡漢祚傳五世禪于晉凡四十
六年○蜀劉備字玄德漢景帝之後起兵討賊據有荆
蜀漢亡稱帝傳子禪二世凡四十三年降于魏○吳孫
權字仲謀父名堅兄名策積累世之業跨有江東傳孫

皓四世五十九年降于晉○三國各爭漢祚而魏乃據
中原幾有天下之半吳蜀皆偏方之地然魏不能并吞
吳蜀而終歸于晉○晉司馬氏武帝名炎字安世祖名
懿伯名師父名昭世執魏政至炎廢魏主稱帝都洛陽
是為西晉傳至愍帝為劉聰所弒而西晉亡凡四世五
十二年○東晉元帝名睿司馬懿曾孫瑯琊王觀之子
母夏侯氏與小吏牛金通而生長為安東將軍鎮建業
及愍帝遇害即位于建業傳至恭帝滅于宋凡十一世
一百五年○兩晉之間五胡僭亂前後據於北方者二
趙三秦五燕五涼成夏並詳于晉書及十六國春秋

宋齊繼梁陳承為南朝都金陵

南朝宋武帝姓劉名裕彭城人仕晉封宋王弒恭帝即位傳至順帝滅于齊凡八世六十年○齊高帝姓蕭名道成蘭陵人仕宋封齊王弒順帝即位傳至和帝滅梁凡七世二十三年○梁武帝姓蕭名衍齊之族仕齊封梁王弒和帝即位傳至敬帝滅于陳凡四世五十七年○陳武帝姓陳名霸先吳興人仕梁封陳王弒敬帝即位傳至後主滅于隋凡五世三十三年四朝俱都金陵南史之外各有國史

北元魏分東西宇文周與高齊

北朝元魏拓跋氏世居北方其初甚微至道武帝名珽始強盛都平城傳至孝武帝為其相高歡所逼奔長安是為西魏傳至恭帝滅于周○東魏靜帝名善見孝文之孫高歡所立分魏為二都鄴在位十七年為高洋所廢元魏并東西二魏凡十七主一百九十一年○北齊高氏初高歡立靜帝自執其政至子洋篡位是為文宣帝傳帝緯滅于周凡五世二十九年○後周宇文氏宇文泰擁魏孝文帝自執其政至子覺廢恭帝篡位是為

孝閔帝傳至靜帝滅于隋凡五世二十六年。

迨至隋一土宇不再傳失統緒

隋楊氏文帝名堅弘農華陰人相周封隋王廢靜帝篡位國號隋南平陳一統天下子煬帝名廣荒淫無道天下大亂不再傳而隋之統緒失焉李淵立恭帝無幾禪于唐凡三世三十八年北史之外四朝各有國史。

唐高祖起義師除隋亂創國基

唐高祖李氏名淵隴西人仕隋為太原守威望素著煬

帝東巡不反關中大亂高祖倡義起師入關立恭帝號令天下未幾遂移隋祚而開創國基矣。

二十傳二百載梁滅之國乃改

高祖開基其子太宗之功居多傳至中宗為母武氏所廢周武氏篡位二十一年睿宗復位至子玄宗寵楊妃致安祿山之亂帝遷西蜀肅宗即位于靈武傳至哀帝二十世二百九十年而梁滅之國祚於此改焉。

梁唐晉及漢周稱五代皆有由

後梁太祖朱氏名溫。礪山人。從黃巢為盜。降唐為節度使。賜名全忠。弒昭宗。廢哀帝。篡位。都汴。梁為子友珪所弒。三子友貞殺珪。自立為李存勗。所滅二世十七年。○後唐莊宗朱邪氏名存勗。沙陀人。先世事唐。賜姓李氏。父克用以平黃巢。封晉王。至存勗。滅梁。稱帝。好遊戲。遇害。克用之養子邈佶烈代立。是為明宗。傳子閔帝。明宗養子從珂又篡其位。凡四世十四年。滅于晉。○後晉高祖石氏名敬瑭。明宗之壻。借契丹兵。滅唐。子齊王為契丹所滅。凡二世十一年。○後漢高祖劉氏名智遠。沙陀人。仕晉。封北平王。及齊王被執。代晉稱帝。子隱帝為亂。

兵所殺。凡二世四年。○後周太祖郭氏名威。邢州人。仕漢。鎮鄴都。弒隱帝。即位。傳至恭帝。禪于宋。凡三世十年。以上稱之。五代一興一亡。皆有所由焉。○五代之際。僭偽十國。吳。南唐。前蜀。後蜀。南漢。楚。吳越。閔。南平。東漢。並詳五代史卷末及十國春秋。

炎宋興受周禪十八傳南北混

宋以火德王。故稱炎宋。太祖趙氏名匡胤。涿郡人。仕後周。為殿前都檢點。恭帝幼。契丹入寇。將兵禦之。至陳橋驛。將士擁還汴。遂即位。都汴。傳至欽宗。九世。金兵陷汴。

徽欽父子為金所虜。○南宋高宗名構。徽宗第九子。封康王。徽欽北狩。康王即位。都臨安。傳至帝昺。九世滅于元。兩宋共十八世。三百二十三年。○兩宋之時。國于北方者二。曰遼。曰金。遼契丹之改號。太祖耶律氏。名阿保機。子太宗名德光。改國號遼。傳至天祚。滅于金。凡九世。二百九年。○金完顏氏。太祖名阿骨打。滅遼。都燕國。號金。傳至哀帝。九世。一百十九年。滅于元。○元太祖奇渥溫氏。名鐵木真。起自蒙古。至子太宗伯顏。滅金。至世祖忽必烈。建國號曰元。滅宋。始混一天下。傳至順帝。滅于明。

十七史全在茲載治亂知興衰

十七史。當時正史之數也。史記起五帝。至漢武。漢司馬遷撰。唐司馬貞作。三皇紀補之前。漢書。後漢。班固撰。後漢書。劉宋范曄撰。三國志。晉陳壽撰。晉書。唐太宗撰。宋書。梁沈約撰。南齊書。梁蕭子顯撰。梁書。陳書。唐姚思廉撰。北魏書。北齊書。魏收撰。北齊書。隋李百藥撰。後周書。唐令狐德棻撰。南史。北史。唐李延壽撰。隋書。唐魏徵撰。唐書。宋祁歐陽修撰。五代史。宋歐陽修撰。作者言十七史之大略。全載在于茲也。治亂興衰之故。可考而知也。

○續十七史有宋史遼史金史元脫脫撰元史明宋濂撰明史清張廷玉撰并謂二十二史

讀史者考實錄通古今若親目

凡讀史者考其歷朝之實錄治亂賢奸彰明較著通達古今如親眼所見則微旨與義可得而明也

口而誦心而惟朝於斯夕於斯

凡讀史書要心口相應口誦而心不惟則扞格而不入心惟而口不誦則神志不專朝或於斯而夕或不然則

所學有時而廢所得有時而亡非時習之道也

昔仲尼師項橐古聖賢尚勤學

此以下雜引古人以勸勉學者也項橐古之神童七歲為孔子師聖人尚且從師學況今之小生可不勉乎

趙中令讀魯論彼既仕學且勤

宋趙普薊州人事太祖太宗官至中書令嘗謂太宗曰臣有魯論一部以半部佐太祖定天下以半部輔陛下致太平趙普既仕貴為宰相猶且勤讀書如此

披蒲編削竹簡彼無書且知勉

前漢路溫舒牧羊澤中截蒲草編用寫書讀之受春秋通大義後為山陰令○後漢吳恢為南海太守子祐年十二隨至官恢欲殺青竹簡以寫書祐諫曰此書若成載歸恐為國家所疑恢然之借以勤業彼二賢無書而尚知勤學如此

頭懸梁錐刺股彼不教自勤苦

孫敬三國人性嗜學常閉戶讀書不堪睡則以繩繫頭

髻懸之梁上○戰國蘇秦遊說不遇而歸為骨肉所賤乃發憤讀書困倦欲睡引錐刺股彼二子雖無父兄之教其勤苦如此

如囊螢如映雪家雖貧學不輟

晉車胤篤學不倦家貧不常得油夏月囊螢照書讀之後官至吏部尚書○晉孫康性敏好學家貧無油冬夜映雪讀書官至御史大夫二子家雖貧勤學不輟如此

如負薪如挂角身雖勞猶苦卓

前漢朱買臣家貧賣薪自給懸書於擔頭行步誦讀後為會稽太守○隋李密才兼文武志氣雄遠嘗微時乘黃牛讀漢書挂餘本牛角楊素見而奇之二子身雖勤勞而猶苦卓如此楊雄法言云顏苦孔之卓

蘇老泉二十七始發憤讀書籍

彼既老猶悔遲爾小生宜早思

宋蘇洵字明允號老泉年二十七始發憤讀書與二子軾轍名動京師二十七歲不可謂老但較之人生八歲

入小學十五入大學則已老矣言老泉年已老一旦悔向學之遲發憤以成大名爾輩小生方少年之時宜早思上進若年與時馳至于老大則悔無及矣

若梁灝八十二對大廷魁多士

彼既成眾稱異爾小生宜立志

大廷天子之廷也魁多士中狀元也宋梁灝字大素雍熙中進士第一時年八十二官翰林學士言灝年高才雄對策大廷為眾所稱異爾輩宜立志向學至老不倦

以灑自期也。

瑩八歲能詠詩。泌七歲能賦。棊

彼穎悟人稱奇。爾幼學當效之。

北魏祖瑩字元珍。八歲能通詩。耽讀書。父母恐其成疾。禁之不止。常密於灰中藏火。待父母寢。然後燃燈讀書。以衣被蔽塞窓戶。恐漏光為家人所覺。由是聲譽益甚。時號為聖小兒。後官秘書監。○唐李泌字長源。七歲能文。玄宗召入見。時帝與張說棋。說試之曰。方若棋局。圓

若棋子。動若棋生。靜若棋死。泌即答曰。方若行義。圓若用智。動若騁才。靜若得意。帝大悅。賜束帛。言瑩與泌幼年穎悟。人皆稱奇。爾幼學之輩。當效之也。

蔡文姬能辨琴。謝道韞能詠吟。

彼女子且聰敏。爾男子當自警。

後漢蔡邕女琰字文姬。六歲知音律。邕夜彈琴。絃絕。琰曰。第一絃。邕故斷一絃而問之。琰曰。第四絃。邕曰。偶中耳。琰曰。昔季札觀風。知四國興衰。師曠吹律。知南風不

競由此觀之。何得不知乎。漢末大亂。為胡所獲。琰在胡。作胡笳十八拍。幽怨悲傷。曹操與邕有素。聞之以金購回。○晉謝安兄奕女。名道韞。安嘗內集。俄而雪降。安問諸子姪曰。大雪紛紛何所似。兄子朗曰。撒鹽空中差可擬。道韞曰。未若柳絮因風起。安奇之。言文姬道韞。雖女子。聰敏而能辨。琴詠詩在爾等男子。尤當自警也。

唐劉晏方八歲舉神童作正字
彼雖幼身已仕爾幼學勉而致

有為者亦若是

唐劉晏字士安。南華人。玄宗封泰山。晏始八歲。至行在獻頌。帝奇其幼。命張說試之。說曰。國瑞也。即授太子正字。公卿邀請。號稱神童。一日召見楊妃親為縮髮。帝問曰。卿作正字。正得幾字。晏對曰。天下字皆正。惟有朋字未正。後為唐室宰輔。言晏雖幼。童身已出仕。爾輩幼學當勉力。以致之。奮發有為。亦若是已矣。

犬守夜雞司晨苟不學曷為人

犬則有守夜之能使盜不敢犯雞則有報曉之能使人知早起雖禽獸猶能效力如此苟為人子而不知力學則曾雞犬之不如曷以為人乎

蠶吐絲結繭蜂釀蜜人不學不如物

蠶能吐絲結繭蜂能採花釀蜜雖微蟲猶能資服食之用其有益乎人大矣汝等堂堂男子而不知力學無所益世則亦微蟲之不如也

幼而學壯而行上致君下澤民

夫人幼而學聖賢之道壯而得行其道也上以致其君於堯舜下以澤其民於雍熙孟子曰窮則獨善其身達則兼善天下亦此意也

揚名聲顯父母光於前裕於後

學為賢人君子仕為名士忠臣名聲揚於四方寵命及於父母上光耀於祖先下垂裕於後昆矣孝經曰立身行道揚名後世以顯父母孝之終也

人遺子金滿篋我教子惟一經

人唯欲多積金錢以遺留子孫我則惟以一經教子使為聖賢而已漢書韋賢傳遺子黃金滿籩不如教一經籩竹器受三四斗

勤有功戲無益戒之哉宜勉力

唐昌黎韓愈有云業精於勤荒於嬉可見勤敏有功而遊戲無益也凡為人子者其能戒之哉宜黽勉刻苦則德業日進自馴致乎聖賢之域矣吾願天下之為父師者知教子弟而為子弟者亦當體父師之心矣夫然後可相與有成也

三字經集註終

小傳

王應麟字伯厚慶元府人九歲通六經淳祐元年舉進士調西安主簿遷揚州教授初登第言曰今之事舉子業者沽名譽得則一切委棄制度典故漫不省非國家所望於通儒於是閉門發憤誓以博學宏辭科自見假館閣書讀之寶祐四年中是科遷國子錄進武學博士疏言陛下閱理多願治久當事勢之艱輿圖感於外患人才乏而民力殫宜強為善增脩德無自沮怠恢弘士氣下情畢達操紀綱而明委任謹左右而防壅蔽求拾人以輔後嗣遷大常主簿上疏極言邊事時丁大全諱

言邊事於是應麟罷大全敗起為秘書郎累遷將作監度宗視朝謂應麟曰為學要灼見古人之心對曰嚴恭寅畏不敢怠皇克勤克儉無自縱逸強以馭下制事以斷此古人之心然操舍易忽於眇綿兢業每忘於游衍人君宜防未萌之欲存不已之誠帝嘉納遷秘書少監進起居舍人冬雷上疏言十月之雷惟東漢數見命令不專姦邪並進卑踰尊外凌內之象賈似道怒以秘閣脩撰主管崇禧觀久之起知徽州其父為嘗守是郡皆曰此清白太守子也抑豪右省租賦民大悅召為起居郎兼吏部侍郎指陳成敗逆順之說且曰國家所恃者

大江襄樊其喉舌議不容緩朝廷方從容如常時事機一失豈能自安親臣無以邊事言者似道復謀斥逐適以毋憂去似道師潰江上授中書舍人直學士院於是上疏陳時務十事且言圖大患者必略細故求實效者必去虛文請集諸路勤王之師有能率先而至者宜厚賞以作勇敢之氣進禮部尚書曰食應詔論荅天戒五事陳備禦十策皆不用左丞相留夢炎用徐囊為御史擢江西制置使黃萬石等應麟繳奏曰囊與夢炎同鄉有私人之嫌萬石粗戾無學南昌失守誤國罪大今方欲引以自助善類為所搏噬者必携持而去吳浚貪墨

輕躁。豈宜用之。况夢炎舛令。慢諫。謹言弗敢告。今之賣
降者多。其任用之士。疏再上。不報。出關。俟命。再奏曰。因
危急。而紊紀綱。以偏見。而拂公議。臣封駁不行。与大臣
異論。勢不當。留疏入。又不報。遂東歸。詔以翰林學士名
識者。以為奪其要路。寵以清秩。非所以待賢者也。應麟
亦力辭。後三十年卒。所著書三十餘種。

讀其書。而不知其人。可乎。今節錄宋史本傳。及歷代
名臣言行錄。以附卷尾。

明治十六年二月

坦庵居士正幹識



明治十五年六月五日出版權願
同十五年七月廿九日版權免許
同十六年三月 日 刻成

東京府平民

著述并出版人 渥美正幹



同府下四谷尾張町八番地

同府平民

發兌人

吉川半七

同府下京橋南傳馬町丁目土番地

